

CANORTA TGIMIROLA SAVOGNIN: da nov cun gruppa da giuier rumantscha

# Ena gruppa da giuier per rumantsch

**pb.** Avant bung en onn ò la Canorta Tgimirola davert las sias portas a Savognin. Scu filiala dall'uniu Laibella. Igl travagl marscha, anc scu pitschna famiglia. Da nov è la mesemda ena gruppa da giuier rumantscha tgi antscheva igl settember.

Glindesde passo on las responsablas dalla Canorta Tgimirola a Savognin anvido tots interessos ad ena seira d'infurmaziun. E responsablas èn Monika Battaglia e Bettina Bergamin, tottas dus commembraas da suprastanza dall'uniu Laibella e lò an spezial per la canorta d'ufants a Savognin. Per igl travagl cun la direcziun pedagogica è pladeida 100 % Pascale Layaa-Laulhé.

Igl travagl marscha ossa en onn ed ins seja ena pitschna famiglia. Durant l'emda cun igls deis glindesde, marde e gievgia e venderde ins vegia 14/15 unfants. An tgira pon neir unfants davent da treis meis anfignen tar la vigliadetna da scola.

Previa seja en nov plaz da giuier davant la Cantina, la tgesa dasperas la Gelgia, noua tgi la Canorta Tgimirola ò igl sies domicil. Igl Lions Club Savognin fetscha cò lavour da sustign. Bettina Bergamin ò er appello a tot las mammas e babs da s'annunzgier, schi ins vegia buenas ideias tge tgi ins savess far spezial cun igls unfants.

## Totta de u dus mez deis

Igl travagl dalla Canorta Tgimirola è mecta flexibel. Igls educatours son purtar lour unfant/s gio la dumang allas 07.00. Pussebel ègl da purtar els anfignen las 08.45. Igls unfants dastgan alloura star anfignen las 18.30, pero gio a parteir dallas 16.30 ins so neir per els. Glè pero er pussebel da purtar els angal per en mez de. Seia chegl igl avantmezde cun giantar ed alloura anfignen las 13.30/14.00. Ed ins pò er surdar igls unfants alla canorta igl sivamezde. Seia chegl cun giantar davent dallas 11.00/11.15 u sainza giantar davent dallas 13.30/14.00.

Dasperas Pascale Layaa-Laulhé scu manadra, lavoura alla canorta a Savognin Anita Höltschi cun 60 % tar l'administraziun, Sandra Arpa-gaus cun 40 % tar la tgira e Sarina Collet cun 40 % e Suely Spini scu coneducatouras.

Igl program digl de sa preschainta uscheia, tgi siva tgi igl taimp da purtar igls unfants ins vegia igl amprem bler da rachintar da nov. Ed alloura i detta gio igl «züni» cun robas da nou-schs e fretga. Siva ins antscheva la «lavour» scu tala cun gis, codeschs, musica, zamberger etc.



Ricarda Graf (san.) e Patrizia Plaz vignan a parteir digl settember 2016 a manar la gruppa da giuier tgi è da nov an rumantsch ed è per las dus annadas avant igls onns da scoletta.

Per igl giantar seja igl agen team precuro. E si va giantar seian unfants tgi dorman, oters var dan codeschs u tedlan musica.

Igl travagl dalla canorta vign purschia igl glindesde ed igl marde ed alloura la gievgia ed igl venderde.

## Mesemda e per la gruppa da giuer

La mesemda è la canorta alloura reservada per la gruppa da giuier tgi ins ò gio introduua igl onn passo. Cò dastgan neir unfants dallas dus annadas avant la scoletta. Davent dallas 08.45 anfignen las 11.15 vignan chels unfants ansem en. Betg angal per giuier, mabagn la fegnemeira principala è dad eir anturn cun oters unfants. È chella gruppa da giuier stada anfignen ossa an tudestg, duess ella neir da nov per rumantsch. E chella duess antschever igls 7 da settember e cozza anfignen las vacanzas da stad. An tot 34 gedas. La contribuziun annuala per en unfant è 640.- fr.

Preschainta alla seira d'infurmaziun era er la mussadra dalla Scola Surses, Daniela Steier. Ella benevainta tgi ins viglia ossa far la gruppa da giuier an rumantsch. Per l'egna seja chegl igl lungatg tgi ins vegia siva ainten scola e schi la gruppa da giuier seja an tudestg, alloura i seja grev da far discorrer unfants tgi vegian giuia lò ansemrumantsch ainten scoletta. Preschainta era er Zegna Dosch, la presidenta dalla Uniu Rumantscha Grischun Central. Scu tala vegia ella magari adegna puspe da far attent a talas dumondas, cura tgi geia per far

ensatge an rumantsch u na tudestg. Ella seja pero angratzgevla tgi ins vegia adegna già ena ureglia averta e vegia musso tgapientscha per la tgossa. Ed ossa seja er ella cuntainta tgi seja reuschia da far chesta gruppa da giuier. E chella ò perfign en bel nom rumantsch, numnada-maintg «Artg an tschiel».

L'interessenza per la gruppa da giuier para dad esser avant mang. Dall'organisaziun ins vot realisar la gruppa, schi dat aglmanc 10 annunzgas. Scu ideal ins vei en domber anfignen 15 unfants. Per manar la gruppa da giuier ins ò catto dus donnas cun la duevla cumpetenza. Chegl èn Ricarda Graf scu mussadra e Patrizia Plaz scu educatoura dad unfants pitschens.

Ellas dus vignan a far tenor lour pudeir da metter an peis ena gruppa da giuier tgi vign siva a chegl tgi ins spetga dad ella. E schi vignan er oters lungatgs tranteraint n'è chegl ansomma betg tragic. Gist ainten chella vigliadetna son unfants profitar linguistica maintg ferm egn da l'oter. Ed amprender cun giuier è gio ancuna-schaintamaintg la metoda la pi efficienta ed er la pi leva. Ed ensacu è la gruppa da giueir ossa etableida scu furma da cuminanza per igls unfants avant la scoletta. E dasperas igl diverti-maint tgi duess star an amprema-lengia, vignan er dumondas scu disciplina, risguard e forsas er pacienztga ad esser en tema. Zont per unfants tgi èn sulets u anc sulets a tgesa seian talas experientschas da gronda muntada sociala.